

पीएलजीए सैनिक शिक्षक , साहसिक कमाण्डर ,  
कॉमरेड अजित (आत्रम सुरेश) ना  
क्रांतिकारी पिस्वड



सेंट्रल मिलिटरी कमिशन  
भारत ता कम्युनिस्ट पार्टी (माओवादी)



## पीएलजीए सैनिक शिक्षक, साहसिक कमाण्डर, कॉमरेड अजित (आत्रम सुरेश) ना क्रांतिकारी पिस्वड

सेंट्रल इनस्ट्रक्टर टीम (केंद्र सैनिक प्रशिक्षण विभाग) सदस्य कॉमरेड अजित (आत्रम सुरेश) सेतेम्बर 24 तारीख नरका तीन बजे गुण्डे रोमसि शहीद अत्तोर। ओरा शहदत पीएलजीए तुक, मुख्य रूप ते सेंट्रल रीजियन ते पीएलजीए कुन बिडिया नुकसान आंदू। दीर्घकालिन अनुभव मत्ता, क्षमता मत्ता, जीवा कीसि करहतना प्रशिक्षक इंजे माकिन इल्लेर। कोया, तेलुगु, हिंदी भाषा ते जनयुद्ध सिद्धांत तुन, गुरिल्ला युद्ध कार्यनीति, युद्ध तकनीक, युद्ध निपुणता कुन अल्को वेहत्ता सैनिक गुरुजी इंजे मावा कोण्डा मुन्नेटल माइत्तोर। 30 साल ता वर्ग संघर्ष ता, गुरिल्ला युद्ध ता अनुभव मंजि माट आधार आयना डिवजनल कमेटी स्तर ता कॉमरेड कुन पार्टी नुकसान अत्ता। दण्डकारण्य ता जनता कुन वर्ग संघर्ष लोपा ताकी कीत्ता नेताल इल्लेर। ओरा शहदत क्रांतिकारी जनता कुन, मावा पार्टी कुन, पीएलजीए कुन नाराज ता विषय आंदू। मति क्रांतिकारी आंदोलन लोपा ओर कीत्ता काम, ओर आचरण ते तोहता कम्युनिस्ट मूल्य उत्पीडित जनता कुन, मावा पार्टी केडरलोर कुन, पीएलजीए योधदालोर कुन हमेशा प्रेरणा ईता। ओर ताकता अरिंदे ओस्सो दृढ रूप ते नित्ति मंजि, क्रांतिकारी आंदोलन तुन मुन्ने ओयना साटि कोशिश कीयनद मावा कर्तव्य आंदू। अदेन साटि ओना 30 साल ता क्रांतिकारी पिस्वड ता बारे ते पुंदकल।

महाराष्ट्र राज्य गढचिरोली जिला अहेरि तालूका जिम्मलगट्टा रेंज अर्कापल्लि नाटे राजगोण्ड आदिवासी गरीब किसान कुटुंब ते 52 साल मुन्ने कॉमरेड आत्रम सुरेश जनुम अत्तोर। आरवुर पिल्ला पेकोरा लोपा कॉमरेड सुरेश वीसराल मर आंदूर। अस्के तिना शहीद आयना जाम कॉमरेड सुरेश ना पूर पिस्वड जनता ना संगे, जनताना लड़ाइ संगेने मत्ता।

कॉमरेड सुरेश ना यायो बाबो सुरेश किन नाटे मंदना प्राथमिक स्कूल ते भर्ती कीत्तोर। ओर अगा 5वी एवनल पढेमत्तोर। पिस्वड साटि अद इलाका ता जनता वेदुर कूली काम कीवलोर। कॉमरेड सुरेश ना कुटुंब तोर वने इद कूली काम कीदुर। स्कूल ते पढेमासोरे कॉमरेड सुरेश उडला तिना इव कूली काम बरा कीदूर। ओन किन पाटा, ढाका इतेके गिरदा मंदू। कबड्डी करसना इतेके वेल्लाय जीवा कीदूर। राजगोण्ड आदिवासीरा एंदना कला रूप ओन किन वांदू।

अर्कापल्लि नार क्रांतिकारी आंदोलन कुन गुण्डे लेक्कटद आंदू। अद नाटेनल बेचवुरो योधदालोर, शहीदलोर मंतोर। कॉमरेड सुरेश इद क्रांतिकारी विरासत तुन पोइत्तोर। उडला तिना क्रांतिकारी कार्यकर्तालोरा सभा, सांस्कृतिक कार्यक्रम कुन ऊडसोरे, केंजसोरे बेरस्तोर। अद समय ते जंगल विभाग तोर कीयना अत्याचार कुन विरोध कीसोरे, वेदुर कूली बेरसी कीयना साटि जनताना संघर्ष वेल्लाय ताकसोरे मत्ता। अस्के कॉमरेड अजित 15 साल उम्रतोर आंदूर। अद नार एरे जिम्मलगट्टा ते पुलीस केम्प मत्ता मति अद नार क्रांति लोपा वेल्लाय काम कीत्ता। अर्कापल्लि नाटे पार्टी जनता लोपा मीटिंग कीसि राजनीति वेहत्ता, संगठित कीत्ता। कॉमरेड सुरेश जनता ना संघर्ष कुन नेतृत्व कीयना दण्डकारण्य आदिवासी क्रांतिकारी मजदूर संगठन (डीएकेएमएस) लोपा शामिल अत्तोर। पार्टी जनता कुन व्यापक संघर्ष लोपा ताकी कीत्ता। अव संघर्ष लोपा सक्रिय काम कीसोरे कॉमरेड सुरेश जनता ना तिप्पल पुत्तोर। अवेन मापना अरिं समझेमत्तोर। अस्केटके लढाई लोपा पूर्ण काल कार्यकर्ता इसाब ते काम कीसोरे मत्ता तना दादा ना अरिंदे तना वने लढाई लोपा दायकल इंजि आलुस्तोर। पार्टी तुन तना विचार वेहत्तोर। पार्टी अनुमोदन संगे 1991 ते लोन विडिचि गुरिल्ला दलम लोपा भर्ती अत्तोर। तनवा पोरोय अजित इंजि बदली कीत्तोर। भर्ती अत्ता दिया तिना आराम लेवा जनता साटि काम कीत्तोर।

1991-94 नडमा कालम ते महाराष्ट्र सरकार गढ़चिरोली संघर्ष पोरो तीव्र दमन लागू कीत्ता। अव संघर्ष कुन ओपवा रीति ते दबा

कीयला कोशिश कीत्ता। अद समय ते 60 जन डीएकेएमएस नेतालोर कुन, जन मिलिशिया सदस्यलोर कुन हौकता। नाटे नाटे आदिवासी, गैर आदिवासी जनता कुन अरेस्ट कीत्तोर। अंगडम केस वाटि जेल ते तास्तोर। नक्सलवादीर कुन गाटो ईयमंतीर इंजोर जनता कुन तिप्पल कीत्तोर। इव दमन रीति जिला मेण्ड सादल विषय लेक्का मंदू। इद परिस्थिति लोपा हिम्मत संगे काम कीसोरे, वर्ग संघर्ष लोपा कच्ची लेक्का बनेमासोरे कॉमरेड सुरेश वेल्लेय काम कीत्तोर।

कॉमरेड सुरेश भर्ती अत्ता इलाका लोपा इचुन समय काम कीत्ता पेरके चामोर्शि इलाका ते बदली अत्तोर। दल सदस्य लेक्का क्रांतिकारी पिस्वड कुन चालू कीत्ता कॉमरेड अजित आंदोलन कुन, सिद्धांत कुन, सैनिक कार्यनीति कुन समझेमासोरे ढाका ढाका ते विकसित आसोरे वत्तोर। मुन्ने दलम ता डिप्यूटी कमाण्डर जिम्मेदारी ते मत्तोर। इद समय ते पार्टी अनुमति संगे दलम लोपा काम कीसोरे मत्ता कॉमरेड कुन मर्मी अत्तोर। इद क्रम ते सुरेश राजनीतिक इसाब ते विकसित अत्तद ऊडि पार्टी ओन किन प्रमोशन ईत्ता। कॉमरेड सुरेश कमाण्डर जिम्मेदारी ते दलम कुन ताकी कीसोरे, इद इलाका लोपा जनता कुन राजनीतिक इसाब ते संगठित कीत्तोर। दलम कॉमरेड्स कुन पार्टी ता राजनीति बारे ते, दुश्मन ना कार्यनीति ता बारे ते वेहवलोर। तीव्र दमन लोपा मावा बल कुन बद इसाब ते राका कीयनदो, जनता लोपा काम बद्रम ताकी कीयनदो समझा कीवलोर। चामोर्शि इलाका लोपा वेल्लाय कालम काम कीत्तोर कॉमरेड अजित। अद समय ते अस्केटा आंध्रप्रदेश राज्य ता जना नाट्य मण्डलि ता कलाकारलोर ईत्ता संस्कृतिक प्रशिक्षण लोपा छात्र मत्तोर।

पार्टी ता जरूरत साटि कॉमरेड अजित 2003 ते भामरागड़ इलाका गट्टा एरिया कमाण्डर जिम्मेदारी ते बदली अत्तोर। अगा 6 महिना काम कीत्तोर। 2001 ते ताकता मुन्नेटा पीपुल्सवार दूसरी कांग्रेस निर्देश ईत्ता कर्तव्य कुन पूरा कीयना साटि पार्टी गढ़चिरोली तिना इचवीर कॉमरेड्स कुन 2003 ते माड़ डिवीजन तुक बदली कीत्ता। अदेना लोपा कॉमरेड

सुरेश, ओना जीवन साथी माड डिवीजन तगा बदली अत्तोर। माड डिवीजन ते माडिया आदिवासीरा रीति रिवाज, कृषि रीति कुन पुंजोरे लढाइ तुन विस्तार कीयला कॉमरेड अजित विशेष काम कीत्तोर। डिवीजन ते एलओएस, एलजीएस ते काम कीत्तोर।

माड ते काम कीयना समय ते शहीद कॉमरेड मंगतू संगे दस महिना पश्चिम बंगाल राज्य पश्चिम मेदिनीपूर ते क्रांतिकारी आंदोलन तुक मदत ते पीएलजीए बल कुन सैनिक प्रशिक्षण ईत्तोर। दल ता काम काज लोपा जरूरत मत्ता बेसिक पोजिशन्स, फायर एण्ड मूवमेंट, इद्रम ता प्राथमिक विषय कुन करहतोर। अद्रमे निर्माण लोपा तनक मत्ता अनुभव तुन अगता कॉमरेड्स कुन वेहत्तोर। कॉमरेड्स ना विश्वास जीकतोर। बंगाली भाषा करित्तोर।

दण्डकारण्य क्रांतिकारी आंदोलन तुन उचस्तर तुक विकसित कीयना योजना संगे पार्टी 2001 जनवरि महिना ते अस्क्रेटक मत्ता प्लाटून 1 संगे ओस्सो नालुंग प्लाटून कुन निर्माण कीत्ता। प्लाटून 1 तुन माड डिवीजन तगा बदली कीत्ता। कॉमरेड अजित प्लाटून 1 लोपा शामिल आसि पेरकेटा कालम ते कमाण्डर अत्तोर। तीन साल एवनल इद प्लाटून ते काम कीत्तोर। जिला केंद्र नारायणपूर एरे मंदना नाहक लोपा जनता लोपा राजनीति तुन प्रचार कीयला कोशिश कीत्तोर। इद इलाका ता टेरेइन् पोर्रो पकड पोइत्तोर। उडला, मध्यम रंगना गुरिल्ला कार्रवाहींग कीत्तोर। माड इलाका ते दुश्मन बना कीत्ता पेहला केम्प कुने कुर्सेनार वेर्सेय आंदू। इद केम्प पोर्रो पीएलजीए वेल्लाय बार फायरिंग कीत्ता। इदेना साटि मिलिशिया कुन प्रेरणा कीसि पुलीसतोरिन कंदरा कीयना कार्रवाही कीयना लोपा कॉमरेड अजित ना भूमिका मत्ता। कॉमरेड अजित प्लाटून 1 कमाण्डर मत्ता समय ते सदस्यीरा लोपा उयतूर पीपीसी लोपा विकसित अत्तोर।

2006 आखरी ते ताकता माड डिवीजन पार्टी अधिवेशन ते कॉमरेड अजित डिवीजनल कमेटी सदस्य चुनेमत्तोर। सैनिक शक्ति तुन विकसित कीयना साटि बनेमत्ता माड डिवीजनल कमाण्ड कुन पेहला

कॉमरेड राजु इन चीफ मत्तेके, ओर शहीद अत्ता पेरके अद जिम्मेदारी तुन कॉमरेड अजित एत्तोर।

2005 तिना माड ते क्रांतिकारी जन कमेटी ता निर्माण शुरू अत्ता। अव निर्माण कीयना, अवेन किन राका कीयना, मिलिशिया तुन निर्माण कीयना लोपा कॉमरेड अजित ना योगदान वेल्लेय मत्ता। इव कमेटी तिना एरिया स्तर ता क्रांतिकारी जन कमेटींग बनेमत्ता। 2007 ते माड डिवीजनल सरकार कमेटी प्रथम प्रतिनिधि सभा ताकता। अद सभा तुन सफल कीयना लोपा कॉमरेड अजित ना भूमिका मत्ता। अद साल अगस्ट आखरी ते एसजडसी निर्णय इसाब ते लढाई तुन मजबूत कीयना साटि डिवीजन कुना पुनरनिर्माण ताकता। पूर्वी बस्तर डिवीजन बनेमत्ता। कॉमरेड अजित माड डिवीजन तेने मत्तोर।

### **सेंट्रल इनस्ट्रक्टर टीम ते क्षमतापूर्वक प्रशिक्षक कॉमरेड अजित**

2008 फरवरि ते पार्टी ता जरूरत इसाब ते कॉमरेड अजित सेंट्रल इनस्ट्रक्टर जिम्मेदारी पोइत्तोर। पार्टी ईत्ता इद पूना जिम्मेदारी तुन कॉमरेड अजित पक्काय कुशि ते एत्तोर। अद दिया तिना शहीद आयना जोम 12 साल ओर सेंट्रल इनस्ट्रक्टर टीम ते मंजि सेकडो पीएलजीए सैनिकलोर कुन सैनिक प्रशिक्षण ईसोरे, गुरिल्ला युद्ध तुन तेज कीयना साटि काम कीत्तोर।

सेंट्रल इनस्ट्रक्टर इसाब ते लढाई लोपा सैनिक क्षमता बेरसि कीयना साटि कॉमरेड अजित पार्टी ताकी कीत्ता मिलिटरी ट्रेनिंग केम्प तिना करिसोरे बेस ता प्रशिक्षक बनेमत्तोर। सिद्धांत तुन अध्ययन कीसोरे द्वंद्वात्मक विश्व दृष्टिकोण तुन विकसित कीत्तोर। अलग अलग युद्ध तकनीक कुन करियला ध्यान ईदूर। बेस्केटा अस्के पूना युद्ध तकनीक कुन करिसोरे पीएलजीए बल कुन करहवालोर। 2008 अगस्ट ते सेंट्रल मिलिटरी केम्प ते करित्ता क्राल्स, मूक्स, एंबुश, काउन्टर एंबुश, रेइड्स, फायर एण्ड मूवमेंट, बूबी ट्राप्स, कम्युनिकेशन, एक्युरेट शूटिंग, स्नाइपर

विषय कुन रोजे प्राक्टीस कीसोरे पकड हासिल कीसोरे पीएलजीए कुन प्रशिक्षण ईदूर।

2009–2010 ते गढचिरोली–गोंदिया डिवीजन ते, दक्षिण बस्तर ते ताकता मिलिटरी केम्प ते प्रशिक्षण ईत्तोर। 2012–13 ते ताकता सेंट्रल मिलिटरी केम्प ते छात्र मंजि एंबुश, रेड्ड, कंबाट स्क्वल्स, एडर डिफेन्स, नाइट मूवमेंट इद्रम ता विषय पोरो पकड हासिल कीत्तोर। 2013 ते इव विषय ना बारे ते दर्भा डिविजन ते पीएलजीए बल कुन कारहतोर। 2012 ते डीके ते दूसरी बेटालियन बनेमत्तस्के अदेन ड्रिल्स करहना लोपा शामिल मत्तोर।

सेंट्रल इनस्ट्रक्टर टीम ते मंजोरे कॉमरेड अजित सेंट्रल रीजियन लोपा मंदना स्पेशल जोन कुना लोपा, राज्य कुना लोपा विस्तृत रूप ते सैनिक प्रशिक्षण ईत्तोर। 2013 ते ओडिशा राज्य ते, 2014 ते रीजनल बल कुन, 2015 ते एओबी बल कुन प्रशिक्षण ईत्तोर। 2015–17 ते ताकता मिलिटरी लीडरशिप ट्रेनिंग प्रोग्राम, एमएलटीपी केम्प ते शामिल अत्तोर। अदेना पेरके 2016–17 ते ताकता दण्डकारण्य, एओबी, ओडिशा ते अलग अलग डिवीजन कुना लोपा ताकता मिलिटरी लीडरशिप ट्रेनिंग प्रोग्राम केम्प कुने इनस्ट्रक्टर ट्रेनिंग ईत्तोर। 2018 ते दण्डाकारण्य ते स्नाइपर ट्रेनिंग काजे उत्तर, दक्षिण सब जोन कुना लोपा प्रधान, द्वितीय बल कुन, रीजनल बल कुन, तेलंगाणा बल कुन, एक्शन टीम कुन मिलिटरी केम्पकु ताकी कीत्तोर। 2019 ते उत्तर, पश्चिम सब जोन ते स्नाइपर ट्रेनिंग, बेसिक विषय कुना बारे ते अलग अलग कंपेनींग कुन, द्वितीय बल कुन प्रशिक्षण एवसी कीत्तोर।

2020 ते माड डिवीजन लोपा पूना भर्ती अत्ता पीएलजीए बल कुन प्रशिक्षण ईत्तोर। डीके स्पेशल जोनल इनस्ट्रक्टर टीम जिम्मेदारी ते मत्ता कॉमरेड सूर्या शहीद अत्ता पेरके पुनरनिर्माण अत्ता अद टीम कुन युद्ध तकनीक करहतोर। अद साल ते उत्तर सब जोन ते जुलाइ–अगस्ट ते महिला मिलिटरी केम्प कुन ताकी कीत्तोर। इद्रम सेंट्रल रीजियन मेटा तीव्र दमन नडमा पीएलजीए बल कुन प्रशिक्षण



ईयना लोपा महत्वपूर्ण भूमिका निभा कीत्तोर। प्रशिक्षण ना संगे संगे अलग अलग एंबुष, रेइड्स लोपा शामिल आसि अनुभव गडस्तोर। पार्टी ता राजनीतिक दिशा—सैनिक दिशा तुन क्षमतापूर्वक ते लागू कीसोरे अदेना इसाब ते प्रशिक्षण ईसोरे कार्यनीतिक प्रति हमला लोपा दुश्मन पोरो देम्मा ईयला कॉमरेड अजित कोशिश कीत्तोर। 2020 अगस्ट ते तनवा टीम ता सदस्यलोर कुन, अगा मत्ता पीएलजीए बल कुन पार्टी मौलिक दस्तावेज पोरो क्लास वेहत्तोर।

इनस्ट्रक्टर इसाब ते कठिन विषय कुन पक्काय हल्को ते, सब्बेतोर किन समझेमायना लेक्का वेहवाल। तनवा टीम लोपा पूना सदस्यलोर कुन प्रशिक्षण ईसि ओर कुन बेस ता सैनिक प्रशिक्षक लेक्का विकसित कीत्तोर।

दुश्मन ना हमला तुन हारा कीयला जरूरत मंदना सैनिक कार्यनीति कुन, कंबाट, तकनीक, स्किल्स कुन करिसोरे, पीएलजीए बल कुन करहसोरे वत्तोर। सेंट्रल इनस्ट्रक्टर इसाब ते कॉमरेड अजित सेंट्रल रीजियन ते सब्बे राज्य कुनगा प्रधान, द्वितीय बल कुन, डीके ते इव रेंड बल कुना संगे बुनियादी बल, मिलिशिया कुन बेचुको केम्पकु ताकी कीत्तोर, अवेना सैनिक क्षमता कुन विकसित कीत्तोर। इद इसाब ते कॉमरेड अजित 12 साल काम कीसि, हमेशा पूना विषय कुन करिसोरे, पीएलजीए बल कुन करहसोरे क्षमतापूर्वक प्रशिक्षक इसाब ते विकसित अत्तोर।

### **साहसिक कमण्डर**

चामोर्शि दलम ते काम कीयना समय ते 1991—2002 ते अगा ताकता टाण्डावाहि, पूसेर, तोयनार, पैडि तगा दलम डेरा पोरो दुश्मन कीत्ता फायरिंग लोपा कॉमरेड अजित तमवा दलम संगे हिम्मत ते प्रतिरोध कीत्तोर। इद समय ते कसनसूर दलम संगे मंजि अस्के ताकता बुर्गि, पोर्टावि जेवेल्लि, पूसुगुट्टा फायरिंग कुना लोपा हिम्मत संगे प्रतिरोध कीत्तोर।

गढ़चिरोली डिवीजन ते दुश्मन ना हमला तुन प्रतिरोध कीत्ता मेडि आपर्चुनिटी एंबुश ते, गोड्सूर डेलिबरेट एंबुश ते शामिल आसि दुश्मन कुन देम्मा ईत्तोर। 2011 ते उत्तर बस्तर डिवीजन ते सुलेंगा केम्प पोर्से कीत्ता राकेट हमला लोपा कॉमरेड अजित षामिल अत्तोर। 2016 ते पूर्वी बस्तर डिवीजन कुसुमा आइटीबीपी केम्प पोर्से कीत्ता राकेट हमला ते बरा कॉमरेड अजित शामिल मत्तोर। पेरके अद डिवीजन लोपा ताकता सामाजिक शोध लोपा भाग अत्तोर। 2017 ते ताकता टीसीओसी ते माड ते जेड्डा, उत्तर बस्तर डिवीजन ते महल्ला-2 एंबुश ते बारा आर्टिलरी टीम ता जिम्मेदारी ते मत्तोर। 2020 ते माड स्पेशल टीसीओसी लोपा शामिल अत्तोर।

### **पीएलजीए बल कुन प्रोत्साहन ईसोरे**

बगा अत्तेके बरा पीएलजीए बल कुन हमेशा प्रेरणा ईदूर कॉमरेड अजित। ग्राउण्ड ते कसरत कीयनगा, तिंदनगा, समिष्टि कीयनगा तनवा दीर्घकालिन राजनीतिक पिस्वड ता अनुभव कुन वेहवाल। कॉमरेड अजित मंतोर इतेके अगा बोराइ आहे मन्नोर। दुश्मन हमला कॅपेइन बेचुक वत्तेके बरा दुश्मन हमला बेचुक फासीवादी रीति ते ताकतेके बरा हिम्मन संगे प्रतिरोध कीसोरे क्रांतिकारी संकल्प संगे काम कीयना इंजि, सरेण्डर आयनायो इंजि, जीवा विडसना जोम जनता साटि काम कीयना इंजि पीएलजीए बल कुन हमेशा वेहवाल आंदूर।

महिला कॉमरेड्स कुन कॉमरेड अजित विशेष मदत ईयनोर। तनवा जीवनसाथी संगे राजनीतिक दुष्टि ते मंदूर। वान किन सलहा सूचना ईदूर। अद कॉमरेड कुन बदाइ मुश्किल वत्तेके मदत ईदूर। सैनिक प्रशिक्षण ईयनस्के महिला कॉमरेड्स कुन बेस ता प्रोत्साहन ईदूर।

### **सांस्कृतिक क्षेत्र लोपा**

कॉमरेड अजित कलाकार आंदूर। एरिया लोपा काम कीयनस्के जनता ना मीटिंग लोपा पाटा ओयवाल। डपली पायसोरे चेतन नाट्य मंच कलाकारलोर कुन प्रोत्साहन ईयवाल। कैंडरलोर कुन प्रेरणा

ईयवाल। माड डिवीजन सरकार बनेमत्ता सभा ते कॉमरेड अजित ना पाटा क्रांतिकारी जोश नीहता।

### **कम्युनिस्ट मूल्य ना आदर्श**

कॉमरेड अजित तना किन समझेमत्ता विषय कुन सीदा वेहवाल। पेरके मुन्ने आयवालेवा कॉमरेड्स लोपा गलत कुन तोहिंदूर। तना किन परिचय लेवा इलाका ते दायना साटि तयार मंदूर। पार्टी ईत्ता काम बदाइ पूरा कीयना लोपा शक्ति मेण्ड काम कींदूर। तना किन स्वास्थ्य समस्या वत्तेके बरा कर्तव्य कुन पूरा कीयना लोपा मुन्नेने मंदूर। सादा सीदा जीवन शैली ते, कम्युनिस्ट मूल्य कुन पोरो तेहिचि पोइत्तोर। अलग अलग इलाका ता कैडरलोरा लोपा राजनीतिक चेतना तत्तोर। 30 साल ता दीर्घकालिन क्रांतिकारी पिस्वड लोपा बद्रम ता कठिन परिस्थिति ते बरा पेरके मुन्ने आयवालेवा, क्रांति पोरो विश्वास विडस्वालेवा, बेस ता हिम्मत संगे, पार्टी ईत्ता जिम्मेदारी तुन पूरा कीत्तोर। बदलेमासोरे मत्ता दुश्मन ना कार्यनीति तुन मुकाबला कीसोरे दुश्मन ना कार्यनीति तुक बराबर ता युद्ध तकनीक कुन विकसित कीत्तोर। जीवा विडसना जोम अन्यवर्ग (गैर सर्वहारा रुझान) लोपा अन्वालेवा निट्टम ता कम्युनिस्ट इसाब ते जनता कुन सेवा कीत्तोर।

2018 डिसेम्बर ते कॉमरेड अजित कुन हाई बीपी बीमार मंता इंजि समझेमत्ता। अस्केतिना गोली तिंजोरे मत्तोर। शहीद आयना तुक 4 दिया मुन्ने बीपी बेरसी मत्ता। जीवा बेस इल्वामत्ता। पेरके बेस अत्तोर। मति सितम्बर 24 तारीख नरका 3 बजे उडका अंजि वासि अचानक मुटतोर। कॉमरेड अजित ना संगे मत्ता कॉमरेड्स तुरंते प्राथमिक चिकित्सा कीत्तोर। मति जीवा अत्ता। कॉमरेड अजित शहीद अत्तोर।

समाधान फासीवादी चौतरफा हमला ताकना नेटा समय ते कॉमरेड अजित ना शहदत पार्टी कुन, जनयुद्ध कुन, पीएलजीए कुन बिडिया नुकसान आंदू। कॉमरेड अजित तिना प्रशिक्षण एत्ता सेकडो पीएलजीए कमाण्डरलोर, योधदालोर, जन मिलिशिया सदस्यलोर कॉमरेड अजित दृढ़ संकल्प तुन, स्फूति ता आदर्श तुन एतना। दुश्मन ना फासीवादी हमला

तुन मुकाबला कीसोरे जन युद्ध तुन मुन्ने ओयकल। भारत देश ते नव जनवादी क्रांति तुन सफल कीयकल। कॉमरेड अजित ना आशय तुन मुन्ने ओयकल।

- ◆ अजित किन लाल सलाम!
- ◆ कॉमरेड अजित ना आशय कुन मुन्ने ओयकल!
- ◆ युद्ध तकनीक पोरो पकड हासिल कीयकल!
- ◆ पीएलजीए तुन मजबूत कीयकल!
- ◆ जनयुद्ध तुन तेज कीयकल!

**2020 नवम्बर 2**

**क्रांतिकारी अभिनंदन संगे  
सेंट्रल मिलिटरी कमिशन  
भारत ता कम्युनिस्ट पार्टी (माओवादी)**

